

**LIGJI Nr. 05/L - 040**

**PËR NDRYSHIMIN DHE PLOTËSIMIN E LIGJIT Nr.04/L-026 PËR MARKAT TREGTARE**

**Kuvendi i Republikës së Kosovës;**

Në bazë të nenit 65 (1) të Kushtetutës së Republikës së Kosovës,

Miraton

**LIGJ PËR NDRYSHIMIN DHE PLOTËSIMIN E LIGJIT NR.04/L-026 PËR MARKAT TREGTARE**

**Neni 1**

Në nenin 1 të ligjit bazik pas paragrafit 1 shtohet paragrafi i ri 2 me tekstin si në vijim:

2. Ky ligj është në përputhshmëri me Direktivën nr. 2008/95/EC e Parlamentit Europian dhe Këshillit të datës 22 tetor 2008 Për përaftrim të ligjeve të Shteteve Anëtare lidhur me Markat Tregtare (Version i kodifikuar), (OJ L 299, 8.11.2008 p. 25-33), Direktivën 2004/48/EC e Parlamentit European dhe Këshillit, Prill 2004 Mbi Zbatimin e të Drejtave të Pronësisë Intelektuale ( O.J. L 157, p.45, 30.4.2004; O.J. L 195, p.16, 2.6.2004).

**Neni 2**

Neni 2 i ligjit bazik fshihet dhe riformulohet me tekstin si në vijim:

**Neni 2**

2. Ky ligj zbatohet për markat tregtare në lidhje me mallrat dhe shërbimet në të cilën subjektet i nënshtrohen procedurës së regjistrimit në Agjencinë për Pronësi Industriale të Republikës së Kosovës të themeluar në Ministrinë e Tregtisë dhe Industrisë (në tekstin e mëtejshëm Agjencia) si dhe markat komunitare dhe regjistrimet ndërkombëtare të markës tregtare që vlejnë në Republikën e Kosovës.

**Neni 3**

1. Në nenin 3 të ligjit bazik, paragrafi 1 nënparagrafi 1.3. fshihet, si dhe në tërë tekstin e Ligjit bazik emërtimi “Zyra e pronësisë industriale” (ZPI) - zëvendësohet me emërtimin Agjencia për Pronësi Industriale, tani e tuje (API).

2. Në nenin 3 të ligjit bazik, paragrafi 1 nënparagrafi 1.19 fshihet dhe riformulohet me tekstin si në vijim:

1.19. Licenca Ekskluzive – jepet nga pronari i markës tregtare për përdorimin e saj në baza ekskluzive, qoftë edhe duke e përjashtuar pronarin e markës tregtare nga përdorimi i saj.

#### Neni 4

Në nenin 6 të ligjit bazik, paragrafi 1 nënparagrafi 1.4 fshihet dhe riformulohet me tekstin si në vijim:

1.4. markat tregtare të cilat përbëhen ekskluzivisht nga shenja ose tregues të cilat janë bërë të zakonshme në gjuhën e përditshme ose janë përdorur në mirëbesim (*bona fide*) dhe që kanë krijuar praktika të zakonshme tregtare;

#### Neni 5

1. Në nenin 7 të ligjit bazik, paragrafi 2 nënparagrafi 2.1 fshihet dhe riformulohet me tekstin si në vijim:

2.1. marka e regjistruar me një datë aplikimi apo datë të përparësisë më të hershme në Republikën e Kosovës.

2. Në nenin 7 të ligjit bazik, paragrafi 2 nënparagrafi 2.3 fshihet dhe riformulohet me tekstin si në vijim:

2.3 marka tregtare e cila është e mirënjohur në territorin e Republikës së Kosovës në datën e aplikimit për regjistrimin e markës tregtare, ose kur është e përshtatshme, të drejtën e përparësisë së kërkuar në lidhje me aplikimin për regjistrimin e markës tregtare.

3. Në nenin 7 të ligjit bazik, paragrafi 3 fshihet dhe riformulohet me tekstin si në vijim:

3. Me rastin e paraqitjes së kundërshtimit nga pronari i markës së mëhershme tregtare, sipas nenit 7. 2 të ligjit bazik nuk duhet të regjistrohet marka tregtare që është identike ose e ngjashme me markën e mëhershme tregtare, e cila mbrohet për mallra ose shërbime që nuk janë të ngjashme me ato për të cilat është regjistruar marka e mëparshme tregtare, nëse marka e mëhershme tregtare ka reputacion në Republikën e Kosovës dhe nga përdorimi i markës tregtare në fjalë, pa shkak të arsyeshëm, realizohet një përfitim i padrejtë nga karakteristika dalluese ose nga reputacioni i markës së mëhershme tregtare ose dëmtohet karakteristika dalluese ose reputacioni i markës së mëhershme tregtare.

4. Në nenin 7 të ligjit bazik, paragrafi 4 fshihet dhe riformulohet me tekstin si në vijim:

4. Me rastin e paraqitjes së kundërshtimit nga pronari i markës së mëhershme tregtare, marka tregtare nuk duhet të regjistrohet nëse përfaqësuesi ose agjenti i pronarit të markës tregtare pa autorizimin e pronarit aplikon për regjistrimin e markës tregtare në emrin e vet, përveç në rastet kur përfaqësuesi ose agjenti i arsyeton veprimet e tij.

#### Neni 6

Neni 10 i ligjit bazik, fshihet dhe riformulohet me tekstin si në vijim:

Kur marka tregtare është e regjistruar në emër të përfaqësuesit tregtar ose agjentit pa autorizimin e pronarit të markës tregtare, pronari ka të drejtë ta kundërshtojë përdorimin e asaj marke tregtare nëse ai nuk e ka autorizuar një veprim të tillë, përveç nëse përfaqësuesi ose agjenti e arsyeton veprimin e tij.

## Neni 7

1. Në nenin 11 të ligjit bazik, paragrafi 1 fshihet dhe riformulohet me tekstin si në vijim:

1. Në përputhje me praktikat e ndershme në çështjet industriale ose tregtare, pronari i markës tregtare nuk ka të drejtë t'ia ndalojë një pale të tretë që në veprimtarinë e tij afariste të përdorë:

2. Në nenin 11 të ligjit bazik, paragrafi 1, nënparagrafi 1.2 fshihet dhe riformulohet me tekstin si në vijim:

1.2. të dhënat për llojin, cilësinë, sasinë, qëllimin e përdorimit, vlerën, prejardhjen gjeografike, kohën e prodhimit të produkteve ose kohën e shërbimeve të ofruara, apo karakteristikat e të tjera të mallrave ose shërbimeve;

3. Në nenin 11 të ligjit bazik, paragrafi 1, nënparagrafi 1.3 fshihet dhe riformulohet me tekstin si në vijim:

1.3. markën tregtare, kur është e nevojshme për të treguar qëllimin e përdorimit të mallrave dhe shërbimeve, veçanërisht në rastin e pajisjeve shtesë apo pjesëve rezervë.

4. Në nenin 11 të ligjit bazik pas paragrafit 1 shtohet paragrafi i ri 2, me tekstin si në vijim:

2. Pronari nuk ka të drejtë që markën tregtare t'ua ndalojë palëve të treta, që në praktikat tregtare, ta përdorin një të drejtë të mëhershme e cila vlen vetëm në një lokalitet të caktuar, nëse kjo e drejtë njihet nga ligjet e Republikës së Kosovës dhe brenda kufijve të territorit në të cilën ajo është e njohur.

## Neni 8

Në nenin 13 të ligjit bazik paragrafi 4 fshihet në tërësi.

## Neni 9

1. Në nenin 14 të ligjit bazik paragrafët 2, 3 dhe 4 fshihen dhe riformulohen me tekstin si në vijim:

2. Nëse brenda një periudhe pesë (5) vjeçare nga data e përfundimit të procedurës së regjistrimit, pronari i markës tregtare nuk e ka përdorur atë në Republikën e Kosovës, për mallrat ose shërbimet për të cilat është regjistruar marka, apo nëse përdorimi i markës tregtare është pezulluar për një periudhë të pandërprerë pesë (5) vjeçare, marka tregtare bëhet subjekt i sanksioneve të parashikuara me këtë ligj, përveç kur ekzistojnë shkaqe të arsyeshme për mospërdorimin e saj.

3. Përdorimi i markës tregtare, sipas paragrafit 2. të këtij neni, duhet gjithashtu të nënkuptojë:

3.1. përdorimin e markës tregtare në mënyrë që dallon në elementet të cilat nuk e dëmtojnë karakterin dallues të saj në formën që ajo është regjistruar;

3.2. ngjitjen e markës tregtare në mallrat apo paketimet e tyre në Republikën e Kosovës të menduara vetëm për qëllime eksporti;

3.3. vendosjen e markës tregtare në mallrat apo paketimet e tyre në Republikën e Kosovës vetëm për qëllime eksporti.

4. Përdorimi i markës tregtare me pëlqimin e pronarit apo të ndonjë personi që ka autorizimin për përdorimin e markës kolektive apo certifikuese duhet të kuptohet si përdorim nga ana e pronarit.

#### **Neni 10**

Në nenin 15 të ligjit bazik paragrafi 7 fshihet dhe riformulohet me tekstin si në vijim:

7. Dokumentet që kërkohen për njoftimin e pronarit të markës tregtare duhet t'i dërgohen pronarit të ri të regjistruar nga data e regjistrimit të të drejtës.

#### **Neni 11**

Në nenin 27 të ligjit bazik paragrafi 3 fshihet dhe riformulohet me tekstin si në vijim:

3. E drejta e përparësisë, e njohur sipas nenit 28 dhe 29 të Ligjit bazik e ka efektin që data e prioritetit duhet të llogaritet si data e dorëzimit të aplikimit të markës tregtare, me qëllim të themelimit të të drejtave të cilat marrin përparësi në përputhje me paragrafin 1 të nenit 27 të ligjit bazik.

#### **Neni 12**

Në nenin 28 të ligjit bazik në paragrafin 2 në fund të fjalisë pas fjalës "aplikimit të parë" shtohet fjala "dhe të përkthyer në gjuhën zyrtare".

#### **Neni 13**

Në nenin 33 të ligjit bazik pas paragrafit 2 shtohet paragraf i ri 3 me tekstin si në vijim:

3. Procedura në lidhje me vërejtjet e palëve të treta rregullohet me akt nënligjor.

#### **Neni 14**

Në nenin 35 të ligjit bazik paragrafi 3 fshihet dhe riformulohet me tekstin si në vijim:

3. Nëse kushtet e cekura në nenin 35.1 të Ligjit bazik janë plotësuar, Agjencia i dërgon aplikuesit një kopje të kundërshtimit të parashtruar dhe e fton që t'i paraqesë vërejtjet për kundërshtimin brenda gjashtëdhjetë (60) ditësh nga data e pranimit të ftesës.

### **Neni 15**

Titulli i nenit 36 i ligjit bazik fshihet dhe riformulohet me tekstin si në vijim:

### **Neni 36**

#### **Dëshmia e përdorimit të markës së mëhershme tregtare gjatë procedurës së kundërshtimit**

### **Neni 16**

Në nenin 46 të ligjit bazik paragrafi 3, fshihet fjalia e dytë me tekstin “Kufizimi i listës së mallrave dhe shërbimeve bëhet pasi të paguhet tarifa përkatëse”.

### **Neni 17**

1. Në nenin 50 të ligjit bazik, paragrafi 1 fshihet dhe riformulohet me tekstin si në vijim:

1. Agjencia shqyrton nëse është paguar tarifa e përcaktuar për kërkesën për revokim dhe nëse kërkesa për revokim është paraqitur sipas aktit nënligjor.

2. Në nenin 50 të ligjit bazik paragrafi 2 fshihet dhe riformulohet me tekstin si në vijim:

2.Nëse nuk janë përmbushur kërkesat e parashtruara në paragrafin 1 të këtij Neni ose në qoftëse kërkesa për revokim është parashtruar pas skadimit të periudhës prej pesë (5) vitesh nga regjistrimi i markës tregtare për të cilën kërkohet revokimi, Agjencia duhet ta refuzojë kërkesën për revokim.

### **Neni 18**

1.Titulli i nenit 55 i ligjit bazik fshihet dhe riformulohet me tekstin si në vijim:

### **Neni 55**

#### **Dëshmia e përdorimit të markës së mëhershme tregtare gjatë procedurës së pavlefshmërisë**

2. Në nenin 55 të ligjit bazik paragrafi 1 fshihet dhe riformulohet me tekstin si në vijim:

1. Me kërkesë të pronarit të markës tregtare, pronari i markës së mëhershme tregtare që është palë në procedurën e shfuqizimit duhet të sigurojë dëshmi, që gjatë periudhës pesë (5) vjeçare para datës së kërkesës për deklarimin e shfuqizimit, marka e mëhershme tregtare ka qenë në përdorim në Republikën e Kosovës për mallrat apo shërbimet për të cilat është regjistruar dhe cilat i citon si arsye për pavlefshmërinë e deklaratës, apo që ekzistojnë arsye të duhura për mospërdorim, me kusht që marka e mëhershme tregtare deri në atë datë ka qenë e regjistruar për jo më pak se pesë (5) vjet.

## **Neni 19**

Pas nenit 56 të ligjit bazik, shtohet neni i ri 56A me tekstin si në vijim:

### **Neni 56A**

#### **Rivendosja e serishme e të drejtave**

1. Nëse aplikuesi ose pronari i markës nuk ka vepruar brenda afatit kohor, të përcaktuar me këtë ligj ose akt nënligjor, në lidhje me përmbushjen e obligimeve në afat ndaj Agjencisë, rezultat i së cilës është humbja e të drejtës së fituar përmes aplikacionit për markë ose markës, mund të paraqes kërkesë për rivendosjen e së drejtës për njohjen e markës.

2. Agjencia aprovon kërkesën për rivendosjen e së drejtës për njohjen e markës me vendim, me kusht që aplikuesi:

2.1. të paraqet kërkesën për rivendosje e të drejtës dhe të paguaj tarifën e caktuar;

2.1. të tregojë bazat në të cilën bazohet kërkesa dhe vendos faktet në të cilat mbështet ajo;

2.3. kompletton veprimet e lëna jashtë brenda afatit të caktuar kohor.

3. Kërkesa për rivendosjen e të drejtave mund të dorëzohet brenda tre (3) muajve, duke llogaritur prej datës kur pushon së ekzistuari arsyeja e mos përmbushjes, dhe nëse aplikuesi është vënë në dijeni për këtë mos përmbushje në afat të mëvonshëm, llogaritja bëhet prej ditës kur ka marrë dijeni për këtë.

4. Kërkesa sipas paragrafit 1. të këtij neni nuk dorëzohet pas skadimit të një (1) viti nga data e dështimit për të përmbushur afatit kohor.

5. Para vendimit të refuzimit të plotë ose të pjesërishtëm, Agjencia duhet të njoftoj paraqitësin e kërkesës për rivendosjen e të drejtave për arsyet për të cilat do të refuzoj kërkesën tërësisht ose pjesërisht, dhe e njofton paraqitësin të deklarohet lidhur me njoftimin në afat prej gjashtëdhjetë (60) ditëve nga data e marrjes së njoftimit.

6. Kërkesa për rivendosjen e të drejtave nuk mund të dorëzohet në rast të mos përmbushjes së veprimeve të mëposhtme:

6.1. paraqitjen e kërkesës për vazhdimin e afatit; dhe

6.2. pagesën e tarifës administrative dhe pagesën e tarifës për mirëmbajtjen e markës

## **Neni 20**

1. Titulli i nenit 60 i ligjit bazik fshihet dhe riformulohet me tekstin si në vijim:

**Neni 60****Kontrata dhe dokumentet që rregullojnë përdorimin e markës kolektive dhe certifikuese**

2. Në nenin 60 të ligjit bazik, paragrafët 1, 2 dhe 3 fshihen dhe riformulohen me tekstin si në vijim:

1. Aplikuesi për markë kolektive apo certifikuese duhet që së bashku me aplikimin për regjistrimin e markës kolektive apo certifikuese ti paraqesë dokumentet që rregullojnë përdorimin ose kontratën e cila specifikon përdorimin e saj.

2. Dokumentet që rregullojnë përdorimin ose kontrata që specifikon përdorimin e markës kolektive duhet ti theksojnë në mënyrë të qartë personat e autorizuar për përdorimin e markës, kushtet e anëtarësisë së subjektit, dhe kur ato ekzistojnë, kushtet e përdorimit të markës duke përfshirë sanksionet që pasojnë në rast të keqpërdorimit të markës kolektive apo në rast të shkeljes së dispozitave të rregulloreve ose kontratës.

3. Dokumentet që rregullojnë përdorimin ose kontrata që përcakton përdorimin e markës certifikuese specifikon personat e autorizuar për përdorim të markës, karakteristikat që duhet të certifikohen nga marka, se si organi certifikues i teston ato karakteristika dhe se si e mbikëqyrë përdorimin e markës, tarifave që duhet të paguhen lidhur me përdorimin dhe procedurat për zgjedhjet e mosmarrëveshjeve.

**Neni 21**

Neni 63 i ligjit bazik fshihet dhe riformulohet me tekstin si në vijim:

**Neni 63**

Të drejtën e përdorimit të markës kolektive ose certifikuese e ka çdo person i cili është i autorizuar ta përdor atë pasi të përmbushë kërkesat dhe kushtet tjera të cilat i përcakton legjislacioni në fuqi në lidhje me përdorimin e markave tregtare.

**Neni 22**

Në nenin 64 të ligjit bazik paragrafi 1 fshihet dhe riformulohet me tekstin si në vijim:

1. Pronari i markës kolektive apo certifikuese duhet t'ia dorëzojë Agjencisë çfarëdo ndryshimi të kontratës dhe dokumenteve që e rregullojnë përdorimin e markës.

**Neni 23**

Në nenin 66 të ligjit bazik paragrafi 1, nënparagrafi 1.1 fshihet dhe riformulohet me tekstin si në vijim:

1.1. pronari nuk ndërmerr hapa të arsyeshëm për te parandaluar përdorimin e markës në mospërputhje me kushtet e përdorimit të përcaktuara në rregulloret ose kontratën që e rregullojnë përdorimin e tyre;

#### **Neni 24**

1. Titulli i nenit 78 i ligjit bazik fshihet dhe riformulohet me tekstin si në vijim:

#### **Neni 78**

### **Procedura për revokimin dhe shpalljen e pavlefshmërisë së një regjistrimi ndërkombëtar**

2. Në nenin 78 të ligjit bazik paragrafi 3 fshihet dhe riformulohet me tekstin si në vijim:

3. Afati kohor sipas nenit 78.2 të ligjit bazik nuk mund të zgjatet.

#### **Neni 25**

Në nenin 83 të ligjit bazik, paragrafi 2, referimi në "nenin 7 nënparagrafi 2.1.3. ndryshohet "Sipas nenit 7 paragrafi 3".

#### **Neni 26**

Në nenin 89 të ligjit bazik pas fjalës "sipas dispozitave ligjore në fuqi" shtohet fjala "në Republikën e Kosovës".

#### **Neni 27**

1. Në nenin 96 të ligjit bazik paragrafët 1 dhe 2 fshihen dhe riformulohen me tekstin si në vijim:

1. Pronari i markës tregtare mund të parashtrojë padi kundër secilit person i cili ka shkelur të drejtën e markës tregtare duke kryer pa autorizim cilëndo nga veprimet e cekura në nenin 8, paragrafët 1. dhe 2. të ligjit bazik duke kërkuar:

1.1. konstatimin e shkeljes së të drejtave të markës;

1.2. ndalimin e shkeljes së të drejtave dhe ndalimin e vazhdimit të shkeljes të tilla dhe të ngjashme të të drejtave në të ardhmen.

2. Veprimet e cekura në paragrafit 1, nën-paragrafët 1.1, dhe 1.2. dhe në paragrafin 2 të nenit 96 ligjit bazik gjithashtu mund të bëhen kundër personave të cilët gjatë aktivitetit të tyre ekonomik kanë kryer shërbime duke shkelur markën tregtare apo bëjnë kërcënim për shkelje të të drejtave të markës tregtare.

2. Në nenin 96 të ligjit bazik, pas paragrafit 2 shtohet paragrafi i ri 3 me tekstin si në vijim:

3. Pronari i markës tregtare mund të parashtrojë padi kundër secilit person i cili duke kryer cilindo nga veprimet pa autorizim ka shkaktuar kërcënim serioz të shkeljes së markës së tij tregtare, duke kërkuar distancim nga veprimi në fjalë dhe ndalim të shkeljeve të të drejtave të markës tregtare.



### **Neni 28**

1. Në nenin 97 të ligjit bazik paragrafët 1, 2 dhe 3 fshihen dhe riformulohen me tekstin si në vijim:

1. Pronari i markës tregtare mund të inicioj procedurë gjyqësore kundër çdo personi që ka shkelur të drejtat e markës tregtare duke kryer pa autorizim njërën nga veprimet e cekura në nenin 8, paragrafët 1. dhe 2. të ligjit bazik duke kërkuar që produktet që përbëjnë shkelje të të drejtave të markës tregtare dhe në raste të përshtatshme, materialet dhe mjetet e përdorura kryesisht në krijimin apo prodhimin e atyre produkteve të largohen nga tregu, të konfiskohen apo shkatërrohen.

2. Gjykata shqipton masat e përmendura në paragrafin 1 të këtij neni dhe ate me shpenzime e të pandehurit, përveç nëse ka arsye të veçanta për të mos vendosur kështu.

3. Shqiptimi i masave nga Gjykata sipas paragrafit 1 të këtij neni duhet të jetë në proporcion me natyrën dhe seriozitetin e shkeljes dhe duke marrë parasysh interesat e palëve të treta.

### **Neni 29**

1. Në nenin 98 të ligjit bazik paragrafët 2, 3 dhe 4 fshihen dhe riformulohen me tekstin si në vijim:

2. Pronari i markës tregtare mund të inicioj procedurë gjyqësore kundër çdo personi që ka shkelur të drejtat e markës tregtare duke kryer pa autorizim njërën nga veprimet e cekura në Nenin 8, paragrafët 1 dhe 2 të Ligjit bazik, duke pretenduar pagesën e shpërblimit në shumën që ai do të kishte kërkuar, duke pasur parasysh kushtet në kontratën e licencës, nëse ajo ka ekzistuar ndonjëherë.

3. Pronari i markës tregtare mund të inicioj procedurë gjyqësore kundër çdo personi që ka shkelur të drejtat e markës tregtare duke kryer pa autorizim njërën nga veprimet e cekura në Nenin 8, paragrafët 1 dhe 2 të Ligjit bazik, pa pasur ndonjë bazë ligjore për këtë veprim, vendim të gjykatës ose ligjit, dhe ka përfituar prej saj, duke pretenduar rikthimin ose kompensimin e përfitimeve të tilla në bazë të rregullave të përgjithshme për pasurimin e pabazë.

4. Kur bëhet përcaktimi i dëmeve gjykata duhet t'i marrë parasysh të gjitha aspektet përkatëse, të tilla si pasojat negative ekonomike, përfshirë fitimet e humbura, të cilat i ka pësuar i dëmtuari, çdo fitim të padrejtë të bërë nga shkelësi dhe, në rastet e duhura, elementet e tjera, përveç faktorëve ekonomik, të tilla si dëmin morale të shkaktuar tek pronari i të drejtave si pasojë e shkeljes së të drejtës.

### **Neni 30**

Në nenin 100 të ligjit bazik, paragrafi 6, referimi i neneve "nga 103 dhe 104" ndryshohet në "102 dhe 103".

### **Neni 31**

1. Titulli i nenit 101 i ligjit bazik fshihet dhe riformulohet me tekstin si në vijim:

#### **Neni 101**

##### **Masat e përkohshme në rastet e shkeljes së të drejtave të markës tregtare**

2. Në nenin 101 të ligjit bazik paragrafi 1 fjala "gjykata mund të urdhërojë" ndryshohet me tekstin si në vijim "gjykata mund të shqiptojë".

3. Në nenin 101 të ligjit bazik paragrafi 4 fshihet dhe riformulohet me tekstin si në vijim:

4. Masa e përkohshme e përmendur në nenin 101.1 të ligjit bazik mund të shqiptohet pa e informuar palën kundërshtare të saj, nëse aplikuesi paraqet dëshmi së në të kundërtën masa e përkohshme nuk do të jetë efektive, ose ekziston rreziku se mund të ndodhë dëmtrim i pariparueshëm. Kjo masë mund të shqiptohet pa e informuar palën kundërshtare të saj, nëse aplikuesi paraqet dëshmi së në të kundërtën masa e përkohshme nuk do të jetë efektive, ose që, duke marrë në konsideratë rrethanat shumë të rënda të shkeljes së të drejtave, kjo do të jetë e domosdoshme. Në qoftëse masa e përkohshme është shqiptuar pa e njoftuar palën kundërshtuese, atëherë gjykata duhet të ia komunikojë palës kundërshtare vendimin për masën e përkohshme, menjëherë pas zbatimit të saj.

4. Në nenin 101 të ligjit bazik pas paragrafit 5 shtohet paragrafi i ri 6 me tekstin si në vijim:

6. Kur masat e përkohshme të përmendura në këtë nen revokohen ose parashkruhen për shkak të çfarëdo veprimi ose mosveprimi nga ana e aplikuesit ose kur është gjetur më pas se nuk ka pasur shkelje të markës tregtare ose kërcënim të shkeljes të markës tregtare, atëherë me kërkesë të palës kundërshtare gjykata mund ta urdhërojë aplikuesin që t'i ofrojë palës kundërshtare kompensimin e duhur për çdo dëm të shkaktuar nga masat e përkohshme. Sigurimi i kompensimit të tillë të përcaktuar në këtë nen mund t'i nënshtrohet garancioni depozitimi të sigurt ose depozite të barabartë për qëllimet e shprehura nga aplikuesi.

### **Neni 32**

#### **Hyrja në fuqi**

Ky ligj hyn në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

**Ligji Nr. 05/L -040**

**30 korrik 2015**

**Shpallur me dekretin Nr. DL-026-2015, datë 17.08.2015 nga Presidentja e Republikës së Kosovës, Atifete Jahjaga**